


Lou pouèto Reinié Raybaud

Tricìo Dupuy es ana rescountra lou nouvèu Majourau, lou pouèto di 146 guierdoun, que vèn de se vèire atribuí pèr lou Councistòri la Cigalo de Camargo en simbèu de soun grade. **pajo 12.**



Prouvènço aro

Tóuti li mes, lou journau de la Prouvènço d'aro

Setembre 2007

n° 225

2,10 €

Lou Cercle d'Agermanament Óucitanò-Catalan

Uno entita singulari

Lou Cercle d'Agermanament Occitano-Català (CAOC) vai naisse en 1978, voulié rampli lou vueje que la ditaturo franquisto avié prouvouca en supremessènt l'Oficina de Relacions Meridionals, qu'èro soto la tutelo de la Generalitat e s'ocupavo di relacioun emé l'Óucitanio e de la proumoucioun de la siéuno culturo. Maugrat li bon prepaus dóu CAOC, li circonstànci e li priourita noun soun estado gaire favourablo à l'idèio d'encouraja la culturo catalanò-óucitano dins lou grand espàci que s'estènd dis Aup fin qu'à l'Atlantico e fin qu'à Guardamar.

Maugrat tout, lou CAOC a countinui la toco de difusioun dóu fach óucitan en Catalougno e dóu fa catalan en Óucitanio.

Poudèn dire que la counaissènço atualo, cado cop mai souvènt, es degudo principalamen au CAOC, estènt qu'èisistis pas d'autro entita que se ié counsacro ni toutalamen nimai parcialamen.

Cresèn qu'aquesto singularita dóu CAOC auríe d'estre valourisado pèr lis institucioun catalano fàci à la siéuno incourpouacioun, coume uno associacioun especialisado dins tóuti li proujèt que fan referènci à l'Óucitanio.

Tre 1978 la nostro associacioun, lou Cercle d'Agermanament Occitano-Català (CAOC), travaio intensamen dins li relacioun catalanò-óucitano, perqué entendèn qu'es lou chapitre lou mai impourtant de la proujeicioun esteriouro catalano. Aquesto afirmacioun es estado avalisado pèr tout un millerat d'istòri, senoun tambèn pèr la coustatacioun di resultat óutengu pèr lou CAOC aquèsti darniéris annado.

Aquesto proujeicioun esteriouro catalano, en aquest cas, se n'es retourna en formo de freirenetà, d'estimo, e d'interès vers un comun proujèt futur, que l'ecounoumiò, la culturo e lou tourism n'en formon si pilié principau.

Nous proujeta en Óucitanio, es agrandi noste espàci culturau, tout en ajudant lis interès de touto meno de Catalougno. Em' uno grand difèrènci à respèt di vesin, que soun courdialamen forço bèn aculi.

Óucitanio, bresso de nosto culturo, lengo e istòri, aro es uno esperanço pèr li Catalan dins la novo Éurope de la liberta di pople.

Catalougno pèr lis Óucitan es l'idèu e lou moudele unique de la siéuno futuro eisistènci. Nous-àutri Catalan noun poudèn pas èstre absènt d'aquéu nouvèu sourgènt dis Óucitan, pèr ço que nous sauvaren pas soulet se leisèn mourì la part la mai impourtant de nosto propro culturo.

Enric Garriga Trullols
President dóu CAOC

En Catalougno



La Poujado

900 afouga pèr la cuturo d'oc e catalano se soun acampa dins l'amista.

Pajo 2

Gramatico

Plan-planet, tournan à l'escolo aprene li particularita de nosto lengage.

Pajo 10

Parlaresc

Enquèsto sus li cous de lengo baia pèr lis adute dins li País d'oc

Pajo 3

Sèmblo pas de bon... aquelo empego !

Es forço istrutiéu de s'ana permena sus lou site dóu CIRDOC, lou Cènre Internaciounau de Documentacioun Óucitano. Sèmblo bèn que pèr aquel ourganisme, l'Óucitanio se counfoude emé la region Lengadò-Roussihoun. Es bèn l'idèio que se fasian, mai aro poudèn que n'estre counvincu.

D'efèt, ié coustatan, dins li pajo sus lou "CIRDOC nouvèu", que tóuti li proujèt se raporton à n-aquelo region. E, cerieso sus la pastissarié, ié legissèn que l'Óucitanio es la 3° region de Franço pèr lou tourism (Ieva de Paris) après li Region Rose-Aup e Prouvènço-Aup-Costo d'Azur. E vo, avès bèn legi; es éli que lou dison. Prouvènço es à despart...

P. B.